



Tir Yimym

www.tirymym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymym@gmail.com

TAPAK 2 Yangia anidakangma : f Tir Yimym

tir_yimym

tir yimym

TAPAK 7

Immainsla Jamir indang BLOOM tour
Japan tongogo

Norway chuba Harald V arishi
küm 89 nung süogo



VOL. XXIII ISSUE NO. 317 (ADOK 317) DIMAPUR KÜPTOKNÜ (SATURDAY) LUROI (AUGUST) 29, 2026 ₹ 5.00

Nagaland Assembly nung FNTA Bill benoktsü NSF-i ayongba BEFR, 1873 shisatokden tenzükogo

Kohima, August 28, 2026 (TYO): September 1 nungi Assembly session tenzükaga agidang sorkari Frontier Nagaland Territorial Authority (FNTA) Bill benoktsü ta Chief Minister Neiphiu Rio-i ashi.

Nagaland state Cabinet-i Eastern Nagaland Peoples' Organisation (ENPO) den jembitepogo aser Memorandum of Understanding (MoU) mapa kuma inyakba nung ozüingren tsütsü asadangogo ta pai ashi.

State sorkar ket nung legislative powers mapa lemozüksütsü tashi mali, ajisüaka sorkari ENPO den MoU agitepba akhümtsübütsüsa maparen ka yangluogo ta CM Rio-i ashi.

"Onoki parnok den olemtepogo aser Cabinet lemtet ajanga shidi ka zülüogo. Iba onük ya Attorney General dangi legal opinion atema yok" ta pai ashi.

ENPO-i Attorney General den jembitepba sülen tebilemba aika lemsatepogo aser itemji sendaktepa alirtem den benoka lemsateper mulunga agizükogo ta Rio-isa ashi.

"Onoki MHA dangi shidiji yokogo aser September 1 nü Assembly nung benoktsü aser züngsemtemi agizüksü imlar" ta paisa shisem.

CM Rio-isa Naga yimten tebilemtsü atema olen ka

ashidang state sorkari tematiba political level nung yimjung olemtep alitsüba nenshi.

Kin teloktem, civil society organizations, arogotem, kaketshirtem, sorkar kaketshirtem, MLA tem, parliamentarians aser teintet rogotem den asüngdangtepba sülen September 12, 2024 nü bangzüng karenemogo tapai ashi.

"Ibabangzüng nung nisung 300 temai sign asü. Iba nung Naga tebilemtsü ya political matter kalir anungji Centre sorkar tenüng nung nübo kati tematiba political level ka nung jembitsüla ta lemtetogo" ta CM Rio-isa metetdaksü.

Nagaland sorkar Political Affairs Committee (PAC) ajanga September 1, 2025 nü senden iba bangzüng pusema nungit aser Union Home Minister Amit Shah dangi aben ta paisa shisem.

"Amit Shah-i Union Minister of State for Home Affairs nemiba mapa agütsütsü mulunga agizük aser tang iba osang ya olemtep nung adenba Naga teloktem den lemsatepda" ta pai ashi.

Taruba Assembly session nung tanga onüktem dak alia FNTA aser Foreign Contribution (Regulation) Act (FCRA) onüktem benoka lemsatepsü ta CM Rio-isa ashi.

Dimapur, August 28, 2026 (TYO): Naga Students Federation (NSF)-i Bengal Eastern Frontier Regulation (BEFR), 1873 asadangtsü atema anogo ananü national seminar ka ayongzüka agir.

Iba sentong ya Honibarnü Town Hall, Dimapur nung tenzükogo aser Nagaland o Northeastern region nung BEFR, 1873 maparen asadangtsü aser shisalemsatepsü tenzükogo. Iba shisatokden ya NSF Inner Line Regulation Commissioner (ILRS) ajanga ayongzüker.

"BEFR atema ajaklen o atsüteper saka iba ya mapa kuma meinyaktettsüsa tenokdangba kecha mali. Küm 150 senmang ya kanga dang tashitait aser asenoki iba ya mapa kuma inyaksü maneni merangtsüla" ta Home Commissioner, Nagaland Abhijit Sinha-i ashi

"Lisopur kintem tebilemtsü mesüra temetentem bilema kechisarena ajak shitak inyaka aotsüla. Asenoki sobaliba kümzüka ayudang asen nübortem asoshi terenlok bener arutsü aser tejakleni aotsü asoshi asenoki rongsenketzüng maparen inyaksüla aser ajungkettsüla" ta pai ashi.

"Nagaland sorkari 2025 nung ILP maparen online asütsü merangogo kechiyong nübortem

office-i aotsü aser ILP agizükba nung timtem lir. ILP aginürtemi nüngdakba documents scan asütsü aser upload ser ILP angutsü akok. Nisung aikati online system junga memetet agi manual offline system maneni inyaker" ta Sinha-isa ashi.

State sorkari renloka aoba den külemi kümzüka ayutsü atema rules maneni yanglushia anidaksü. Asenok Nagaland state kümzüka yunür saka kasa mapang ainertem asoshi ILP maparen zübazüba inyaknür ta paisa shisem.

ILP maparen ya India Constitution nung Arrla 371A den külemi benschia arur, Arrla 371A ajanga Naga tamangba yimsü aser lokti inyaksangshi, sobaliba ozüngtem aser ali o ali rongsen kibur aser melentepba kümzüka ayur ta pai ashi.

Arrla 371A ajanga constitutional protection agütsür aser ILP ajanga bendanger aruba nung tenük yoker aser lisopur nütsüng yongsük taginübatem kümzüka ayur ta Sinha-isa metetdaksü.

Iba shisatokden ajanga inner line maparen indang ajunga meteta akümtsü aser iba ajanga tarutsü nung tajungtiba inyaka aotsü shisatsü angutsü imlar ta Home Commissioner Sinha-isa ashi.

"British nungeri Naga Hills madak yimsü asü tenzük saka

parnoki Naga Hills agitsü tejangraba kangabo maliasü. Parnoki lendenlen parnok nübor kümzüka ayutsü atema policy kar yanglu aser iba nung 1873 küm sangoktsüba Bengal Eastern Frontier Regulation ya ka liasü. Iba ya Act of 1870 nungi agiteta yangluba liasü aser Queen Victoria Act ta nüngtugu süa aja" ta Inner Line Regulation Commission, NSF Chairperson Senchumo NSN Lotha-i ashi.

British nungeri mapang Naga nungeri iba ozüng junga memetet liasü saka parnoki British nungeri lendenlen aser tenemlen bendangtsü atema ozüng ka latetogo tabo meteta liasü ta Lotha-isa ashi.

Lia aodang British nungeri Naga Hills ajunga madak yimsü asü aser idangji BEFR 1873 ya sempet tajung ka aküm. Naga nungeri sobaliba, nübortem kümzüka ayutsü atema hadir tajung ka aküm aser Nagaland ya India nung state 16 buba akümdang Naga People's Convention-ia parnok 16-point memorandum nung BEFR 1873 benoka liasü ta pai metetdaksü.

BEFR indang tebilemtsü khuret ya state sorkar dang masü saka Nagaland nung alir ajaki meteta alitsüla aser külemi khuret bena state sorkar den yaritepsüla ta NSN Lotha-isa ashi.

NBCC-i Clean Election Movement asentenshir tenzüker; Nübortem ayongzüker

Kohima, August 28, 2026 (TYO): Nagaland Baptist Church Council (NBCC)-i election merüka, timi aser tebilemtsü khuret bena agitsü atema tayongzüka agütsüshiogo.

Election maparen nung temelenshi ya awareness programmes dak alia inyaksüla aser teti inyakba movement ka akümtsüla ta NBCC-i metetdaksü.

NBCC office nung Clean Election Movement (CEM) tenzükba sentong nung NBCC General Secretary Rev. Dr. Mar Pongener-i ashiba agi NBCC-i küm aika election nung tim masüba anema ola adoka aruba indang lemsatep.

"Nagaland nung clean election kodanga meinyaktettsü ta nisungtemi bilemer saka election nung tim masüba inyakba memelenshitsü ta teimla mali mekümdaktsütsüla" ta pai ashi.

"Tanü nisungtemi tali tejangjaba meteta kümogo. Nübortem tejen yimyatem ashishiteper, arogotem aser teloktemi election nung ochimashi anema maneni jembitsüla. Kija aser teloktemi tebilemtsü khuret abener aser tasütait lemtettem agir" ta Mar Pongener-isa ashi.

"Iba tayongzüka ya election maparen nung dang masü saka lenisüba, sen, tashi aser tebilemtsü khuret abenba



tangatetbatem melenshitsü atema lir. Kodang vote enoktsürtemi vote melen sen, sempet mesüra nija tajangzük angutsü imlar, election ya tebilemtsü abenba lennirtem shimba masü saka senotsü mesüra sempet agütsütepba inyakyim ka dang kümdaktsür" ta pai ashi.

Election nung ochimashiba ya polling anogo nung dang masü saka tarutsü nunga kongshir. Iba ajanga ochimashi, tejak reprangtepba, pei ajangzüksü asoshi dang bilemba, public senotsü tim mesüi amshiba, tebilemtsü khuret mabenba aser public-i temulung malemba adoker ta Mar Pongener-isa metetdaksü.

"Clean Election ya asen temulungjang, kidang, arogotem aser loktitem nungi tenzüker. Iba asoshi Arogoi jembiba ama model ka asütsüla" ta pai ashi.

Asenoki sentongtem agiba

nungi movement ka akümtsüsa inyaksüla. Arogotem sayutsüla, sarasademtsüla, vote aliba magizüksüla, sempet agütsüba magitsüla aser yimyatsüya aser tajung aser lenisüba sempet alirtem shimtsüla ta NBCC General Secretary-isa ayongzüker.

"Clean election ya asenok dak nungi tenzükdü arung. Asen kidang nungi tenzükdü. Asen arogotem nungi tenzükdü. Asen loktitem nungi tenzükdü" ta paisa ayongzüker.

NBCC Social Concern Department Secretary Dr. Villo Naleo-i CEM indang lemsatepdang iba movement ajanga election nung timi, tashishitsü melii aser democratic tangatetba nung shilem agitsü ajungmesor ta ashi.

Clean Election maparen ya 1975 nungi tenzük aser khen atema lemtettem masü saka teti atema lemtet tajung agia loktiliba melenshitsü meranger.

Khristantem teimba ser aliba state ka nung election shitak agitsüba ya Khristan ka teinyaktsü lir ta pai ashi.

Nagaland nung election sobaliba ya kibong, kidong, yimtsüng aser lokti tesentaktep nung ajemdaker angatetsüla. Naga lokti inyakyimtem akhümtsübuba den külemi kija mulungsentsü, democratic freedom, equality aser secret ballot nung ajemdaker noktaksü tayongzüka agütsür ta Dr. Villo-isa ashi.

CEM ajanga lanur voters atongtsü meranger aser 2025-26 tsünga colleges, higher secondary schools, fellowships aser churches nung clean-election olemtep tenetben liogo. Item sentong ajanga kaketshir aser lanur 3,000 shi tongogo ta pai ashi.

Iba sentong nung Sumi Baptist Church, Zunheboto nungi Associate Pastor Ghunato Assumi-i Zunheboto

constituency kübok Nata New Village indang kuli lemsatep.

Taoba election nung arogo lennirtem, village head aser yimdaklirtemi clean & fair election ajungkettsü lemtet agiba atema tangari tatishitsü tajung benschir ta Ghunato Assumi-i ashi.

Election mapang vote enoktsürtem dang peii koba candidate nem vote enoktsünür nüjiso agütsü. Nata New Village-isa election mapang temesepba achiajemtsü ayokba, achiajemba aser alemba noktanga liasü. Yimtsüng nunga political posters, flags aser banners ayutsü temelaba magütsü ta Assumi-i ashi.

Nata New Village-isa candidate aser party workers dang kilen shia sema canvassing memela aser yimdaklirtemi sen mesüra osettsüset agütsüba magizük ta paisa shisem.

Yimdak pastoral team-i prayer meetings, counselling aser awareness programmes agi aser election agitsü jakdang Laishiba nungi tesayubatem agütsü ta Assumi-isa metetdaksü.

Iba ajanga lokti külemi inyakra clean elections ya takoktsü lir ta asüba sayur. Clean election ya taginüba ka dang lir saka külemi mulungtetra aser tasü itra asangsang akümtsü akok" ta paisa shisem.

Imnainla Jamir indang BLOOM tour Japan tongogo



Imnainla Jamir (tiyong) Japan nung BLOOM Tour mapang tangokba noksa nung angur.

Kohima, Luroi/August 28 (TYO): Naga tsür guitarist Imnainla Jamir-i la indang BLOOM Southeast Asia Tour nung shilem ka ama August 27, 2026 nü Japan tonga Nagaland tenüng nung guitar atemer aser kentener ka ama alima sapang nung alizüing tasen ka tongogo.

Japan nung lai Ibanez Japan nungi ketdangsürtem den

sendakteptsü maongka ngutet. Ibanez Japan ya nüngtugu Japanese guitar brand ka lir.

"Ibanez Japan nungi ketdangsürtem den sendakteptetba atema kanga pelar - Hiroshi 'Rocky' Oda (abelen), Marketing Senior Manager, aser Tomo Onogi, Ibanez Artist Relations Chief nungeri Bloom show nung

shilem agiba atema kanga pelar," ta Imnainla-i ashi.

BLOOM show nung Hiroshi "Rocky" Oda, Marketing Senior Manager aser Tomo Onogi, Ibanez Artist Relations Chief aliba ajanga Brehostibar nikongdang sentong tali mejeta liasü, kong artist aser alima nung kanga akhum agüja amshiba guitar brands nungi ketdangsürtem lungjema liasü.

Imnainla asoshi Japan ya la indang musical journey nung kanga tongtipang lir. La Ibanez den sendaktepba ajanga alima sapang nung la züngshiba sayur aser Japan nung guitar aser music community den sendakteptsü sapang tongtipang agütsür.

BLOOM Tour ya lai guitar tema aser ken tena jajaba kisüing masü saka musical exchange aser sobaliba tesendaktep benjongtepba lir, kong alima ajunga indang oshi 'music' ajanga Nagaland, India aser Japan tsüingta apu yanglutsür.

Imnainla-i Japan nung oa iba ama shilem tajung agiba ajanga Nagaland nungi artists tem alima sapang nung shilem agir timba akumba sayur.

Tribal Research Documentation Team nem tetushi agütsü

Dimapur, Luroi/August 28 (TYO): Tribal Research Documentation Team aser State Technical Support Team nem tetushi agütsüba sentong ka Nagaland Sales Emporium Complex (NSE), Kohima indang Conference Hall nung August 28, 2026 nü agia liasü.

Sentong akhumdong ama Prasielie Pienyü, Chairman, NHHDC aden aser pai iba sentong nung jembidang, iba inyakyim ya documentation exercise kisüing masü saka sobaliba senmang wazüka ayuba, traditional knowledge kumzüka ayuba tsütsü tongtipang mera ka lir aser tarutsü putu atema Nagaland nung lisopur indang maitüsü aser sobaliba record bendena yutsür, ta ashi.

Chief Minister Dr. Neiphiu Rio-i mangdang tajung yur yariba aser Chief Minister's Innovations Fund ajanga iba project agizükba atema pai pelaba lemsatep. Pai ano Departments of Science and Technology, Arts and Culture, Information and Public Relations, Industries and Commerce, aser NSDC nungi lenmang sayuba atema pelaba lemsatepa liasü.

Parnoki documentation kaket 12 renema Chief Minister-i sayaogo aser yangji sobaliba sübo-solemtsü, senti osettem, designs, parnok tetetzü aser sendaktepa aliba sobaliba yimyatem awayema lir, ta Pienyü-i ashi.

Pai maneni Naga nunger indang sobaliba senmang tajung wazüka ayutsü, kumzüka amshitsü aser temaba jenjangi ajungkettsü ayongzüka liasü.

Kekhrivior Kevichüsa, IPoS, Commissioner & Secretary, Urban Development & Municipal Affairs ajanga iba project indang otsü tongmelang agi lemsatepdang, iba sentong ya 2022 nung tenzüka aser proposals ya 2021 nung tenzüka liasü, ta ashi. Naga nunger maitüsü aser sobaliba kanga junga sendaktepa lir asünung, tribal bodies aser committees tem den shisa agitepa inyak, ta

pai ashi.

Tapi agi traditional designs aser motifs tem pei mulungba aser commercial atema mamshidaktsütsü mechi document bendena ayutsü tongtipang ta pai ashi. Pai kin 12 indang documentation renemba atema pelaba lemsatep aser ano kin kar nungi telemtetba magütsü lir ta ashi.

Kevichüsa-i tribal documentation committees, teshimtet nübutem, tribal bodies aser NHHDC tam nem tenüingsang agüja liasü.

Iba sentong nung State Technical Team aser Documentation Core Committee nungi Prasielie Pienyü, Chairman NHHDC-Chairperson Documentation Core Committee; Kekhrivior Kevichüsa, IPoS, Commissioner & Secretary, Urban Development & Municipal Affairs; Kumar Ramnikant, IAS, Secretary, Industries & Commerce; Er. Y Lipongse Thongtsar, Managing Director NHHDC; Adela Moa, Director, Art and Culture; Ruopfülenuo, Deputy Director, IPR; Dr. Nesatalu Hiese Lomi, Senior Scientist and Mission Director NASTEC; aser Monyu Konyak, Assistant Project Officer, DUDA nunger nem tetushi agüja liasü.

Iba den Angami, Ao, Konyak, Khiamniungan, Lotha, Pochury, Phom, Rengma, Sangtam, Tikhir, Sumi, aser Zeliang kin tenüng nung Tribal Documentation Teams züngsemtem nema tetushi agüja liasü.

Tribal Documentation Committee tenüng nung Ghovili Achumi, Convenor, Sumi Documentation Committee ajanga jembia aser Er. Y. Lipongse Thongtsar, Managing Director, NHHDC ajanga pela agizükba o jembia liasü.

Iba sentong nung Ezholü Rose, Assistant Manager, NHHDC menden liasü aser Dr. Nesatalu Hiese Lomi, Senior Scientist and Mission Director, NASTEC ajanga melepzüng o jembia sentong tembang.

Chümoukedima industrial units atema awareness sentong ayongzüka

Dimapur, Luroi/August 28 (TYO): Chümoukedima nung aliba industrial units tem atema Special Awareness and Sensitization Programme ka National Clean Air Programme (NCAP) kübok Hotel Saramati, Dimapur indang Conference Hall nung August 28, 2026 nü agia liasü.

Iba sentong ya District Industries Centre (DIC), Dimapur ajanga Nagaland Pollution Control Board (NPCB) den lungjemer industrial units nem mopung menenba, libajen wazüka ayuba aser environmental norms nung shidak anidaktsü nüngdakba indang awareness agütsütsü

nükjiding nung ayongzüka liasü.

Iba sentong nung Functional Manager, DIC, Dimapur, N Abeno Lotha menden liasü aser Jethro Mesen-i iba sentong ayongzüka nükjiding lemsatepdang libajen müreka aser anepalua ayutsü atema industry inyakyim aser ajaki lungjemer inyaktsü nüngdakba indang lemsatepa liasü.

Scientist 'B', NPCB, Yanathung Kithan-i "Ambient Air Quality and Its Impact" indang presentation ka agütsüdang mopung menenba sources aser mopung menendaktsüba aser itemji azüoktsü asoshi mera balala agitsü indang lemsatepa liasü.

Senior Environmental Engineer, NPCB, Aghali A Swu-i "Environmental Compliance of Industries" onük nung ajemdaker jembidang iba sentong nung shilem agirtem nem environmental regulations sülen anidaktsü nüngdakba aser libajen meraksatsüi industrial mapa inyaktsüba indang angatetdakja liasü.

Functional Manager, DIC, Dimapur, Kiyelu T Yephtho-ia sustainable industrial development aser libajen temürekba kumdaktsütsü atema industries aser ozüing amshirtem tsüingta maneni amalitep akatsü nüngdakba indang ashi.

The Gluttones-i 'Modern Naga Tour: Nagaland' sangdonger

Dimapur, Luroi/August 28 (TYO): Naga nunger kentener telok The Gluttones-i mezüingbuba kensep Modern Naga takok ngua sayatetba sülen parnoki September ita "Modern Naga Tour: Nagaland" nüngja agütsür state tesem balala nung ken tena jajatsü sentong lir. Iba mapang parnok den ano Eva Rongmei, Shau Evans aser tanger temia shilem agia ken atentsü.

Tang parnok ya Northeast India sema jajaba mapang lir aser aji tembangba sülen The Gluttones ya Nagaland-i meyipa shilangba sülen Mokokchung, Wokha, Kohima aser Dimapur nung ken tena jajatsü.

Iba mapang parnoki district pezü nungya colleges aser nüburtemi amshiba tesemtem nung tanü-asüing kanga saboba

Naga nunger ken atentsü.

Iba tour ya contemporary Naga music, sobaliba aser creativity benjongtsü nükjiding nung lir. Live performances aser tangartem den külemi ken atenba ajanga parnoki Naga nunger ken tabu balala aser melenshia aruba sayua junga amenoker aliba aser tang tasen kentener asoshi sapang agütsütsü.

Ken dak alia iba tour nungya sobaliba melenteptsü, lanur kentener ajungmesotsü aser Nagaland indang 'independent music scene' ainba nung shilem agitsü nükjiding lir. Ajidang masü iba sentong ya ajanga kentener temi pei otsü lemsateptsü, audiences tasen den sendakteptsü aser lanurtem dang pei ola tajungba nung bushitsü ajungmesotsü.

Iba tour nungya BN Sound, Frequency Hub, Blue Table Production aser Moaki Homestay ajanga yariteptsü.

TXG Expo Nagaland 2026 nung technology inyakyim sayur

Dimapur, Luroi/August 28 (TYO): NBCC Convention Hall, Kohima nung August 28, 2026 nü TXG Expo Nagaland tenzükdang drones, robotics aser yimya balala nung angazükba densema indigenous technologies aser item inyakyim balala sayua liasü.

Iba sentong nung Department of Planning & Transformation kübok Nagaland GIS and Remote Sensing Centre ajanga drones tabu balala sayua liasü, koba Centre ajanga Nagaland GIS stall nung amentepa yanglu.

COVID-19 mapang vaccine

belenba nung amshiba hexacopter drone ka sayuba nüburtemi kanga jangraa repranga liasü. Iba stall nungya FPV drones aser interceptor drone mesüka yangluba tema sayuba den drone operation amshiba yimya live sayua liasü.

NagaBots stall nung robotic arm ajanga sketching yangluba, drones, creative-learning toy kits, 3D amshia keychains aser tanga osettem yanglubatem sayua liasü.

NagaBots ya 2021 küm amenok, koba technology aser research enterprise ka lir aser parnok ya robotics aser coding

nung takotet. Iba enterprise yagi training and education, research and innovation aser NagaBots Incubation Centre ajanga incubation teyari aser electronics supply solutions agütsür.

NagaBots yagi küm shia Technomorphosis sentong ayongzüker, koba technology nung innovation aser creativity jenjang ajungkettsü nükjiding nung lir. Iba enterprise yagi school balala nungi kaketshir 5,000 dak tema nem training agütsüogo aser STEM nung practical skills agütsüba nunga yariteper.



Patna, August 28, 2026: Patna nung Ganga ayong tzü level tali atuba ajanga Nakta Diyara nung tzü tali metsüngba agi yangji aliba nisungtemi iba tesemji toktsür rong ajanga aruba noksa nung angur.

Nepal nungi India nunger 21 meyipa aruogo; 320 tang tashi mangur

New Delhi, Luroi/August 28 (Agencies): Hokolbarnü Ministry of External Affairs (MEA)-i, tzümetzüng lendong agi kongshiba Nepal linük nungi India nunger 21 bo meyipa aruogo, India nunger 320 tang tashi mangur aser India nunger 400 shi iba linük nungji lir, ta metetdaksü.

India sorkarisa China arrtsülen anendaka aliba India nunger noklang aika anir arutsü atema inyaksangshidar, ta MEA-isa metetdaksü.

MEA otongdar, Randhir Jaiswal-i, India nunger 21 Kathmandu nungi meyipa aruogo aser parnok ajak Tamil Nadu nungi lir; tzümetzüng agi kongshiba tesem nungi parnok kümzüka sülen Hokolbarnü Delhi tonga anir aruogo, ta metetdaksü.

Jaiswal-isa, Trishuli One hydropower project nung

inyaker India nunger 63 Brihostibarnü kümzüko aser China tsütsülen aliba India nunger 96 Nepal tongogo aser parnok ajak aniteta anir arutsü atema inyakdar, ta metetdaksü.

Ajisüaka tang tashi India nunger 320 bo mangur mesüra samaogo. Item nisungtemji teimbaka Kailash Mansarovar Yatra atema Nepal-i aoba asütsüa akok.

Jaiswal-isa, India nunger 400 shi China tsütsülen kümzüka lir aser parnoki par kibong züngsemtem den tongteprateptetogo, ta metetdaksü. Beijing nung aliba Indian Embassy nungi ketdangsertemia parnok den tongtepratepdar aser parnok anir arutsü atema local ketdangsertem den inyakdar.

Nepal nung ajungben tzümetzüng lendong tulu atalokba sülen India-i August 26

nikongdang tayimtsü ajanga teyari oset touzük ton 10 bener yokogo; item teyari oset rongnung süki, blankets, hygiene kits, solar milen aser mozü densema liasü.

Iba sülen August 27 nüa India-i tayimtsü ka nung teyari oset touzük ton 37.5 bener yokogo; item teyari oset rongnung süki, blankets, hygiene kits, solar milen, dewatering pumps, generators, mozü aser chiyungtsü densema lir.

Maneni Honokbar aonunga India-i tayimtsü ka nung teyari oset touzük ton 12 bener yokogo. Jaiswal-i, "Nepal nung ketdangsertemi nüngdakba teyari ajak agütsütsü atema onok renema dang lir," ta metetdaksü.

Bodhbarnü ajungben tzümetzüng lendong ajanga Nepal kübok Rasuwa district kanga mejungi kongshia liasü.

Women's reservation agizüktsü atemasorkari inyakdar: Kiren Rijiju

New Delhi, Luroi/August 28 (Agencies): Hokolbarnü Parliamentary affairs minister Kiren Rijiju-i, Ato kilonser Narendra Modi-i tetsürtem atema women's reservation özüng tekeraba nung agizüktsü tebilemba lir, ta metetdaksü.

Brihostibarnü Congress Tir Mallikarjun Kharge-i shidi ka ajanga Ato kilonser dang, union minister-i ashiba ama Parliament temeja senden ka mayongzükdang tamasa delimitation atema jembitsü asoshi party ajak senden ka ayongzükdang, ta mepishiogo.

Women's reservation özüng agizüktsü tebilemba aliba dak sendakba nung Rijiju-i, tesüiba mapangtem nunga Parliament senden tanaben ayongzükdang, ta ashi.

Tzüngluruwa mongpu

Parliament senden August 13 nü tembanga liasü.

Rijiju-i, "Ato kilonser Modi-i linük nung tetsürtem atema inyaksü atemzüka lir. Parliament nung tetsürtem dang nangzüka ama women's reservation ya agizüka benoktsü. Iba nungji ajemdaker onoki inyakdar," ta metetdaksü.

Kharge-i shidi ajanga Modi dang, "Iba onük ya linük atema kanga tongtibang onük ka lir. Yimlibilema tanaben temerangdang aser April 16-17, 2026 anogo nung nai kangshia agizüktsü merangba ama teinyak," ta metetdakja liasü.

Taküm April 16-17 anogo nung Lok Sabha nung iba bill atema vote agütsütep, ajisüaka two-third majority manguba ajanga iba bill magizükteni liasü.



August 28, 2026 nü Ontario, Canada nung Union Finance Minister, Nirmala Sitharaman-i Sri Siva Satyanarayana Swamy tekülem ki semdangba mapang tangokba noksa nung angur.

RSS March nung shilem agir school tesayur ana mapa nungi anentsü

Bengaluru, August 28 (Agencies): Karnataka state kübok Yadgir district nungi sorkar school tesayur anati Rashtriya Swayamsevak Sangh (RSS) route marches nung shilem agiba atema tenaprong mapa nungi anentsüogo.

State Education Department-i, tesayur ana jagi RSS march nung shilem agibaji ajanga service conduct rules anema inyakogo, ta metetdaksü.

August 20 nü Yadgir Deputy Director of School Education, Channabasappa Mudhol-i Hunasagi nung aliba Government Girls' High School nung tesayur Gururaj Joshi

asir Kuppi nung aliba Government Lower Primary School nung head teacher, Anna Saheb Deshmukh na mapa nungi anentsütsü tetuyuba agütsü.

Education department-i, tesayurtemi RSS sentongtem nung shilem agibaji "pei duty sendokba" lir aser ibaji Karnataka Civil Services (Conduct) Rules, 2021 anema lir, ta metetdaksü.

Department-i ashiba agi, yaküm October 12 anogo nung Joshi-i Vijayapura district nung RSS Patha Sanchalana (route march) nung shilem agia liasü, aser pai shilem agiba noksaji osangkakettem nunga adoka

liasü.

Ano külen Deshmukh-ia yaküm October 10 nü Hunasagi nung RSS route march nung shilem agia liasü. Iba sülen pa anema Rural Development & Panchayat Raj and Information Technology Minister Priyank Kharge nem tashishiba agüja liasü.

Department-i, sorkar mapa inyakeritemi yimtenren party tem nung züngsem makümtsüla mesüra yimtenren nung shilem agiba organisations nung shilem magitsüla, ta ashi.

Department-isa, tesayurtemji loktiliba nung tatishitsü tajung sayurtem asütsüla, ta ashi.

Nepal tzümetzüng ajanga ponger aluba tasü mang asem UP nung angu

New Delhi, August 28 (Agencies): Bodhbarnü Nepal nung ajungbena tzümetzüng lendong atalokba mapang kiojen, gari, osettsüset aser nisung aika ayong tzü agi ponger ao; tasü mang asembo kilometer 200 shi ponger aluba sülen Uttar Pradesh nung ang ngutetogo.

Tasü mang asemji Uttar Pradesh kübok Maharajganj nung aliba Gandak ayong nung angu.

Nepal aser India arrtsülen aliba Chitwan district nung tasü mang teimba ngutet; iba district nung tasü mang 132 angu.

Tzümetzüngji Bhote Koshi ayong atongba sülen ang ketdangsertemi osang metetdakja liasü.

Nepal Department of Hydrology & Meteorology nungi Sauharda Joshi-i, tzümetzüngji anepdang 8:40 ako meta Nepal atong aser minute 10 tsüngda Syabrubesi atong, ta ashi. "Tibet nung tzümetzüng aliba mapang nung onok nem iba osangji metetdaksü asübo nisung aika kümzüker lila," ta

paisa metetdaksü.

Anepdang 9:05 ako meta nung ang tzümetzüng osang angazükba sülen Flood Forecasting Division-i Rasuwa, Nuwakot, Dhading aser Chitwan nung ayongkümlen alirtem nem SMS 600,000 yoka tekümdangtsü osang metetdakja liasü.

India nung Sashastra Seema Bal (SSB) teams-i Uttar Pradesh kübok Maharajganj nung tetsür ana aser tebur ka tasü mang ngutet.

SSB inspector Arun Pandey-i, "Tasü mang asem India nunger litsü nung ngutetogo, aser tasü mangji Nepal nungi ponger aluba asütsüa akok ta bilemer," ta metetdaksü.

Tasü mang asemji post mortem agitsü atema Maharajganj district headquarters-i bener ogo. Tang tashi nungbo tasü mang asem maitsüji mejangja.

Indian border security ketdangsertemi Nepal nung ketdangsertem den tongtepratepa maitsüji jangjatsü merangdar, ta paisa metetdaksü.



August 28, 2026 nü Chennai nung Opposition lenir aser DMK lenir Udhayanidhi Stalin (tiyong) den party MLA, K K Kathiravan (ajichi) aser MLA, K N Nehru nunger assembly senden nung adentsü arudang tangokba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUROI 29, 2026

Manipur tensa ya koda ?

2 023 küm May ita tetenzüklen nungi Manipur nunger, shirnok dang Meitei nunger ta ajar, parnok o Kuki nunger na Imphal yimti nung azü poka raratep tenzükba anogo nungi tang tashi Manipur state tensa tia mesüngjemteti tamajungba kuma aoba asenoki angur aser angashir. Aji oda, tamasabo Meitei nunger o Kuki nunger na tsüngda mepetmesü adoka Imphal lenden lima nungi Kuki nunger ajak aridok aser parnok kiojena aika raksatsü aser taküma aika samaogo. Iba ama kasa state nung kin o kin na tsüngda mepetmesü aser mangatettep adoka raratepdang, Union government-ia kecha balaka parnokji tangatettep kati arudaktsütsü merangba mangu aser lokti tentettem rongnunga shingaia yimjung mapa meinyaktet. Aji oda, taoba küm asem tsüngda Manipur nung Meitei aser Kuki nunger na tsüngda yimjung o jembia tangatettepi arudaktsütsü melen, tangbo ano Manipur nung Meitei nunger o Kuki nunger na rara to Naga nunger o Kuki nunger na rara kümogo. Iba jagi yashi yakanü tashi nunga Naga nunger pungo kasetba osang angashiogo. Kasaji, Kuki aser Naga nunger na tsüngda kati ka taküm samatsütsü merangba aser yim dena rongdoktsüba mapatemji temulung ashitsüka lir. Talisa, Kuki aser Naga nungertem na yabo Khristan purtem dang lir, anungji Yisu tenüng nung sarasademer kati ka tepsettsü aser kari kar yim rongdoktsütsüba asenok ajaki Yisu tenüng nung khien bilemdangtsüla. Ochi o kaji, kechikomaka Naga nunger o Kuki nunger na anemtepyonga kati ka Manipur lima nungi mali kümabo mesamadaktsütettsü, anungji tai aika liaka taidokteper yimjung nung külemi lia aotsü lenmang bushitsüba asenok ajak atema tajungba asütsü. Atangji, aji junger saka mapa temela masü. Aji oda, kin ana tsüngda azü poka tsükchiteper külen parnoksa parnok rongnung yimjung bushitsüba asenok ajak atema kiyong-kidanger mesüra medemer temeimer kar nungdaker. Item kidang-kiyonger aser temeimertemji asenok Nagaland nung alir Naga Khristan-tem asütsüla. Joko, asenoki repranga lia asen kidanger Manipur nung alir Meitei, Kuki aser Naga nungertem rongnung yimjung menguteti küm ana asem tashi timtemba angur. Parnok rongnung nisung aika pei ki rongdoker talidak maka timtemdagi. Ano, kar pei tsürabur, kar pei chimur, kar pei apuani aser kar pei kinunger samar mangyin jashi aser tetsübu tia nung lir. Asenoki parnok timtemji angu nungbo mulung animesüngzüktettsü. Parnokji asen kiyong-kidanger aser külem Khristan purtem lir. Aji oda, asen kidanger külem Khristan purtem tetsübu aser shisabolu tia nung alidang, asenok Nagaland nung alir Naga Khristan-tem ajemajema lira, ibaji shitak masü, Tsüngrem tsüngdanga aser nisung tsüngdanga asenok teinyaktsü ka meinyaker asütsü. Asenoki angatettsüba kaji, asenok anasa nisungtem rara adoka tsükchitepba ya tashidak wara poktetba amai lir, aji mapang shitak nung yimkongi anepalu mesüra melamelaa menatepa aotsü. Aji oda, Meitei nunger o Kuki nunger na rara manentsütetba agi , tangbo Manipur nung aliba Naga nunger dena rara nung timatemtsüsa menasemogo. Kasaji, asenoki Manipur nung tang tsükchitepa aliba Naga nunger o Kuki nunger na tsüngda yimjung meyanglutsütet nungbo, ashiko, memenui Nagaland nunga kasa tebilemtsü jagi asenok ajak dang kongshitsüsa ataloktsüa akok. Aji bilema, asen anasa alirtem timtem lendong ajurudang, kasaji asen dak matalok tashi ajemajema melii, asenok dak mekongshidangsa asenoki yimjung o jembia songtemtsüla.

OLEMSABANG

Aya ! makmakshimak

Lenda Jamir, Mkg.

1. Asen Aoer ya küm kwika makmakshimaktsü? Ano küm kwika langtsüngi alutsü ? Alemli tazü mapang Naga kin aika langtem-a tazütsü ka dang agir mangsa aliba mapang asen Aoer ajak mesüaka yim aika nung tazünger karbo adoka langtem melen batelong (half pants) agir, moja masemyonga canvas mesüra slipper asema mapang ka liasü. Asen Aoer alima nung nüngtoko football sayir Dr. T Ao-ibo parnok Olympic nung sayidang par team Deobar (Sunday) anogo sayitsü aliba pai tasü ita ashi "onok Khristantembo deobar nung ball mesayir" ta shia teiner tanga anogo nungang sayi ta asüba pa taküm otsü nung zulua lir. Aji Tsüngrem sentsü nülokba agi pa sentsüwangshir ta aseni angateter. Iba sülen missionarytemi Dr. T Ao bushia arur tenüngsang agütsüba pa taküm otsü nung zulua lir.
2. Ano tang asen tener mezüng tamangba yimsü agizükba arogo küm 150 centennial amongtsü anogo ishika dang lia asen Aoer yim kati 2023 küm Hornbill Festival mapang Deobar nü Kohima nung "Oh Chungliyimti poker" ta ken aten. Küm 150 tain arogo kati iba tashi sayangtet na?
3. Ano niang tamang agi matong asü masüar Molung yim ana case ya koba metendir par arogo jiang Kotaki atutsü asü masar na? Atokong anena lir.
4. Election mapang sen alemba ya talemerji tai ashi tagizükerjibo tai mali masü na? Kechiyong sorkar nungi asen ajak atema aruba pai agizüka alemer dang ta nibo bilemer. Ajia koda?
5. Ano taküm Longpa Yimsen nung Hornbill Festival Moatsü mapang amungdang par yimer yimsüseri media pur dang Moatsü ratet ashidang Teyanglur Tsüngrem dang temoatsü meshia amunger masü saka BAGUVAN (hindu tsüngerm) dang temoatsü meshia amonger ta ashi. Assamese oshi agi Teyanglur Tsüngrem dang Isor (Yisu) ta ajar, saka baguvan yabo hindu tsüngrem dang ajar.

Tsüraburi onok dangbo Moatsü ratet yamaisa ashi "meimchirtem asoshi May ita ya temoatsü ita ta jembir. Tsüngküm asükwa mapang süia arur lanua arua metsü mapang March aser April ita nung ali nung metsü (seeds) yoker May ita moatsü benjong pelatepa amonger. Aoer aluyimertemi moatsü süir alui aodang ali takong surak surak tang nungi tsüina yutsur atokba ali toh tzünglu agi metener ngua aluyimer pelabaji balakasa pelateper. Aji oda May ita ya temoatsü ita ta jembir, aser pai küm piyong asoshi temoatsü bener arutsüba nung küm süidaktsür ta tsüraburi shia aru. Anungji May itaji temoatsü ita ta jembir.

Ano Assamese nunger dang masü tsümarbo ajaki ashishibaji Hindi oshi agia Yisu dang prem isor ta ajar.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Maharashtra nung Khristan tetsür 22 anema ken o benok



August 25, 2026 nü Maharashtra nung Palghar district kübok Wakadpada yimdak Khristantem mita aodang tangokba noksa nung angur.

August 28, 2026: Maharashtra nung Khristan tetsür 22-i arrshi küm 18 kaketshir ka Khristan yimsü dangi meyipdaksütsü merang, ta tai tonglokja police-i parnok anema ken o benok.

Maharashtra nung anti conversion ozüing tesashi ka benoktsü atema anogo ishika dang lia Khristantem apuba atema Arogo nung lenirtemi tebilemtsü akaba lemsatep.

Palghar district kübok Wakadpada yimdak Khristantem anema August 25 nü FIR benok.

August 21 anogo nung Khristan tetsür telok kati kaketshir kiji semdang, aser iba mapang nungji Thane district nungi arrshi küm 46, Satyavati Balkrishna Kunche-i kaketshir nemji Laishiba ka densema Khristan kakettem agütsü.

Kunche-i kaketshir dangji, item kaket azüingba ajanga na shirang aneptsü aser nisungtem tashidak balala nungi jenbutsü ta ashi.

Ajisüaka kaketshir jagi kakettemji magizük aser yimdaklir kar nem iba osangji metetdaksü.

Iba sülen Milind Jole densema yimdaklir kar kaketshir kidang jagi ao. Kunche-isa Hindu nunger tsüngremtem anema jemb, ta tai tongloksü.

Iba tatalokba nung ajemdaker police-i Kunche aser Kusum Shivram Kambdi na leniba nung Khristantemi tanga yimsü amangertem temelung yirutsüogo, ta tai tongloksü.

Tang tashi nungbo police-i nisung shinga pua mali. Tetsür 22 prongla chiokogo; parnok teimbaka Hyderabad yimti nungi lir.

Maharashtra nung Freedom of Religion Act, 2026 ozüing August 28 anogo nungi benoktsü lia Khristan 22 anema ken o benok.

August 27 nü osangbener den jembidang Kalyan diocese nung Bishop Emeritus Mar Thomas Elavanal-i, Palghar

nung ken o benokba atema tebilemtsü akar; tang tensa yamai süra ozüing tasenba benokba sülenbo koma asütsü?, ta ashi.

Paisa, Catholic Arogoi kangshia tangartem yimsü memeyipdaksür, ajisüaka pei melungba yimsü amangtsü atema senso ajak dak temeden lir, ta ashi.

"State nung Khristantemi tayongzükba balala koktettsü atema renema alitsüla," ta pai ashi.

Catholic Secular Forum tentetsang Joseph Dias-i, anti conversion ozüingji Catholic Secular Forum-i manemer, ajisüaka kangshia yimsü meyipdaksüba anema ozüing aika lir, anungji kechiba ozüing tasen ka nüngdaker, ta asüngdang.

Maharashtra densema state 13 nung anti conversion ozüing benoka lir. Nütsüing million 129 aliba Maharashtra nung nütsüing shilem 0.96 dang Khristantem lir.

Haiti nung Khristan aika tepset aser Tenla ki ka rongdoktsü

August 28, 2026: Haiti yimtiba, Port-au-Prince nung ozüing alema inyaker telok kati Khristantem teimba ser nisung 47 tepset aser evangelical Arogo Tenla ki ka rongdoktsüogo.

Parnoki tepsetba nisung 47 nungjagi pongubo tanurtem liasü aser nisung 22 bo Tenla ki compound nung lia tepset.

Ozüing alema inyaker telok jagisa nisung 50 dak tali puer ao.

Amongnü (August 23) tatalokba ya tawa Haiti nung khenyongi nisung teimtiba tepsetba aser puer aoba lir. Haiti nung security tensa tajungba kümdar ta ajaki bilema aliba mapang ka nung iba ya atalokogo.

U.N. Secretary-General António Guterres-i iba tatalokba sashia aitsüogo.

Aid to the Church in Need (ACN) den jembidang Haitian Bishop Joseph Gontrand Décoste-i, Arogo aser Khristantemi ozüing alema inyakba mapatem anema ola adoker, ibayongji ozüing alema inyaker telok balalai Khristantem anema inyaker, ta ashi.

"Tai dang tai ajartemji onok (Khristantem) dang anünga lir, ibayongji parnoki onok samatsüner," ta paisa metetdaksü.

Port-au-Prince nung Catholic Arogo 40 shibo shibangadokogo. Taküm küm tenzüker mezüingbuba ita tenet (January-July) tsüingda kija nunga putir ana puer ogo aser seminarian ka tepsetogo.

Yaküm-a Little Sisters of Saint Thérèse nungi nun ana tepset aser 2024 küm religious sisters 9, brothers pongu aser putir pezü puer oa liasü.

ACN-i ashiba agi, Port-au-Prince yimti shilem 70-90 shibo ozüing alema inyakba telok balalai aziüoker.

Kenscoff Mayor, Jean Massillon-i, ozüing alema inyakertemisa ki 25 rongdoktsü aser sorkar mapa inyaker ana tepset, ta metetdaksü.

"Item ama tatalokba ajanga loktiliba nung tesünep alitsü atema maneni meranga inyaktsü asenok nem nenshia metetdaksür. Kenscoff nung ozüing alema inyakertem samatsütsü atema ketdangsertemi maneni inyaktsü," ta paisa metetdaksü.

Haiti nung ozüing alema inyakba telok balalai timtem agütsüba ajanga nisung million 1.5 shi tesem balala nung jenshiogo. Taküm January ita nungi June ita tashi nung Haiti nung nisung 3,050 dak tali tepsetogo.

ANOGO ABEN TSÜNGREM DEN

Arogo Tasü

"Item teret taküm alitsü kokdi ma?" (Ezk. 37:3)

Ainkar Ezekeil dang Tsüngremer nübur atsüngzüka aoba mangdang ka sayu. Teret takong lenden ka sayu. Teret takong jagi parnok tia sayu. Parnok meyipa marutettsüba jenjang tashi orr liasü. Nüburtemi parnok sasa ayimten, "Onok teimla samaogo!" (t.11). Tsüngremi ainkar dang asüngdang, "Item terettem taküm alitsü kokdima?" Pai tasüngdangbaji Tsüngrem nem meyiptsü, "Kibuba, Nai dang metet!" Meimchir tsütsü nungi tiaji tamakoktsü liasü.

Tanü arogoji tajungba masü. Idakji noksa lir saka ain mali. "Parnoki yimsü keta asenba mapa inyaktsü, saka temeshiba kümdaksüba ain parnoki magizüker" (2 Timo 3:5). Idakji tenüing ka lir saka taküm mali. Khrista Sardi nung aliba arogo arutsü. "Tenüing agi na taküm, saka na tasü lir" (J. Adok 3:1). Rongsen kar saka mangdang mali (J. Adok 3:17).

Idakji mapa (sentongtem) lir saka temeim mali (J. Adok 2:2-4). Renloktsü melen idakji telemsa dang tali adoker. Sayutsüingir jagi ashir, "Aser ano ni anüing kübok O bendangdakji angu, idakjia tamajung liasü, aser temeshi alidakji temenen liasü" (Sayu 3:16). Vance Havneri tutettsür, "Asenok jangratemtsü ki kar, amentsü jangratemtsü car kar, jangratemtsü sermon angatsü jangratemtsü arogo kar. Khristai arütsüba indang asenoki kechi metet?"

Noksa yanglur ka dang telok ajunga mesatsüsa aser asentenshi nüngdak ta angatetdaksütsü teimla nung, süya aliba arogo ka noksa yanglutsü asüngdang. Noksa nungji akhüm taket tenla ki talang ka, jangratemtsü teperang sabang, aina agi tongpanger, sung kishi tulu aser tesangwa tulu tsükloka yanglur kishi tulu anasaji tenla enoktsüdak süngden tila ka tebang nungji sorak zü agi yangpanger yanglu. Au, arogo kobai missionary meyoker mesüra meyarir aji tasü arogo lir. Dr. Oswal J. Smithi (1889-1986) ashir, "Arogo kati sayutsüingi mesüra meranga akümtsü."

Saka Tsüngremi arogoji mesendok. Tasü süngkümi ibaji makoktsü (Mt. 16:18). Asenok shilem Ezekeili ama tashi angatsüba aser shintsüba (Ezek. 37)". Tashi agi, matitaki ayimtenang, Jangzü ama ne ola adokang, aser kü nübur dang parnok ozüing raksaba indang aser Yakob kidong dang parnok temenen indang metetdakjang" (Isa. 58:1). Idangji arogoi kong alitsüla item jagi meyipa arutsü. Ibai army tulu ama noktaksü, aser Khrista asoshi alimaji akoktsü (Ezk. 37:10). Alima tamajungtiba nung tajungtiba arogo nüngdaker.

Hindu lenirtemi Nepal ya 'Hindu linük' ta sangdongtsü akhanger

August 28, 2026: Nepal nung Hindu nunger lenirtem telok kati sorkar ketdangsertem ajurua Nepal ya Hindu linük, ta sangdongtsü atema takhangba agütsüba ajanga yangji aliba Khristantem kanga shisabulur, ta osang ka ajanga metetdaksü.

July 26, 2026 nü Nepal nung Tarai region kübok Sunsari district nung yimsü balala amanger telok ana tsüingda rara adoka nisung asem asü aser aika yirua liasü.

Dewanganj, Sunsari nung Hindu Bolbam procession mapang nung loud speakers amshibaji Muslim nungertemi ashishiba nungi mangatettep adoka liasü.

Rara adokba sülen sorkar ketdangsertemi security sepaitem yok aser iba tesem nungji curfew ozüing benoka liasü. Iba mangatettep nungji yimtenren airdaksüba ajanga anasa aliba district tem nunga tensa mejungi aküm.

Osang angazükba agi, Home Minister Sudan Gurung leniba nung senden ka amenba sülen sorkar ketdangsertem aser Hindu organizations na tsüingda onük 13 nung tezüingzüktep ka agiogo. Item tezüingzüktep rongnung Nepal ya Hindu linük, ta sangdongtsü atema ita asem tsüingda party ajak senden ka mena telemtetba agitsü densema lir.

Pastor kati, Sunsari district nung Hindu yimsü alia amangertemi mapang talangka amokmerena aruba sülen ozü Arogo Tenla ki kangshia shibangdaksüogo, ta ashi.

Tangbo Arogoi online via Zoom ajanga dang tekülem sentong agir.

Ano tanga pastor kati, tawa Hindu nunger o Muslim nunger tsüingda rara adokba mapang nung Khristantembo meyrutsü, ajisüaka Hindu Jagaran, Hindu Samrat Sena, Hindu Swayamsevak Sangh aser Nepal Bajrang Dal units-i maneni Khristantem amokmerener, ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Züsem**

(v) sosem, kinunger adianu (relatives)


* Yim balala süaka nisung aika azü agi züsema lir.

Züsem(n) zükolak lemsar asoba mesüra metena ayuba
(fermenting bamboo shoot in water)

* Züsem agiteta shi den asor.



Tir Yimyim

OLONG PAITEP # 7633**TIPILEN**

2. Tila teri mapa - (8)
5. Anakshinüa ait - (5)
6. Teputep - (4)
10. Kati ka sakloktep - (7)
12. Ozü tila ka - (4)
13. Tenarong-i mangashir - (5)
14. Tapupang o tekanük na
tetsüngda - (8)

LANGTSÜLEN

1. Ajuru-oi ao / Sema ao - (7)
2. Teptsü - (4)
3. Nok amshia raratep - (6)
4. A _ _ _ o - (3)
7. Ninang tulu ka - (4)
8. Nüji masü - (4)
9. Ajüzüa senzüba shiruru ka - (7)
10. Tzü agi teka shitok - (6)
11. Sobusolemtsü agi meputep - (4)
12. A _ _ _ ak - (3)

OLONG PAITEP # 7632 TELANGZÜBA**TIPILEN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket, 14. Mangu,
15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar, 6. Belem,
9. Süjak, 10. Aonung, 11. Dokan,
2. Tinu.

NAI-A YA METETTER MA

Anüngleni 30.6 meters (100,416 feet) tashi tur smar tphone ka tsükdaktsüba ajanga Guinness World Records tasen ka yangluogo aser extreme phone-case tendangba takok tulu nguogo. June 24, 2026 nü Kiruna, Sweden nung iba phone tendanga liasü aser "The Highest Drop of a Mobile Phone in a Phone Case (Natural Landforms)" otsü yanglutet.

Iba AirX Ultra-Cushioned Phone Case ya alima nung protective tech accessories yanglur tajungtiba RHINOSHIELD ajanga yanglutetba lir aser anüngleni tur phone tsükdaktsüba sülen minute 25 shi agia ali nung alua tsük saka AirX protective case ajanga phone meraksa.

US doctor temi Mizoram nem cancer screening kits 3,875 tenlar**Aizawl, August 28, 2026**

(Agencies): US nung amenoka aliba doctor anati Mizoram State Cancer Institute (MSCI) nem cancer screening test kits 3,875 tenlaogo.

Mizoram nung cancer tekaraba nung putettsü aser tendangtsü atema Zemabawk, Aizawl nung aliba MSCI nem iba tenla tulu agütsü.

United States nung Dr Dahiya aser Dr Chauhan nati kits angati tenla aser iba mapa ya Mizoram

Governor, General (Dr) Vijay Kumar Singh-i achaaayanga inyakba lir.

Tenati tenla agütsüba nung Alpha-Fetoprotein (AFP) test kits 975, Carcinoembryonic Antigen (CEA) test kits 950, Prostate Specific Antigen (PSA) test kits 975 aser Fecal Occult Blood test kits 975 dena lir.

Mizoram State Cancer Institute nung screening tashi aittsü aser cancer tekaraba nung putettsü atema test kits amshitsü ta ketdangsürtemi

ashi.

State ajunga renlokba nung public health ya kanga tongtipang lir aser Mizoram nung cancer kanga putetba aser iba ajanga nisung taküm samaba atema tebilemtsü abener ta Governor Vijay Kumar Singh-i ashi.

Shiranger te m ajangzüksüsa kits amshitsü imlar aser Mizoram nung cancer khuret koktetsü atema maparen nung inyakba nung iba tenla ya tongtipang shilem ka lir ta pai ashi.

Sep 2-7 tashi Manipur Assembly senden asemben amentsü**Imphal, August 28, 2026**

(Agencies): 12 buba Manipur Legislative Assembly indang tibuba session September 2 nungi 7 tashi alitsü ta Assembly Secretariat-i metetdaksüogo.

Iba session nung senden asemben dang alitsü ta parnoki ashi saka ibaji Opposition-i aitsür.

Manipur tensa indang olemteptsü atema anogo talila amentsüla ta Congress Legislature Party (CLP) leader K Meghachandra-i metetdaksüogo.

Manipur Legislative Assembly Secretary Rohit Sapam-i senden asemben

amentsüba indang legislative business lemsatep.

September 2 nü obituary references, Business Advisory Committee report, First Batch of Demand for Supplementary Grants for 2026-27 aser government Bills introduction alitsü.

September 3 nü question-and-answer session aser First Batch of Demand for Supplementary Grants for 2026-27 atema olemtep alitsü.

September 7 nü question-and-answer session, supplementary grants atema olemtep aser voting, Appropriation Bill benoktsü aser

government Bills agizüksü.

"Manipur nung tang ajurua aliba tensa atema o atsütepa jembitsü nüngdaker. Asenok amentsü anogo peria melira o atsütepa aser olemtep junga melitetsü. O atsütepa mejembira democracy aser ketdangsürbaren majungtsü" ta Meghachandra-i ashi.

"Küm nung Assembly sittings tajemtibai 50 bosa alitsüla ta lateta lir. Taküm sittings kanga ajema menogo aser iba ya Assembly guidelines alema lir. Assembly nung nübertem ola benoka jembitsü atema sitting days talila nüngdaker" ta Meghachandra-isa ashi.

Amit Shah-i Senapati Medical College atema lung azünga yutsütsü**Imphal, August 28, 2026**

(Agencies): Union Home Minister Amit Shah-i taküm October ita Senapati Medical College atema lung azünga yutsütsü aser state nung terenlok mapatong balala meyipa reprangshitsü ta Manipur Chief Minister Yumnam Khemchand Singh-i ashi.

CM Khemchand-i New Delhi nung Amit Shah den ajurutepa senden amen aser idangji Manipur dak sendakba onüktem benoka lemsatep.

Centre sorkari Manipur nung alirtemi aginübatem tongtsütsü atema inyaktsü ta Shah-i ashi.

Pai October ita Manipur semdangdang Senapati district nung medical college tasen atema lung azünga yutsütsü ta nangzük.

Manipur Cabinet-i tawa tu Senapati nung Medical College tasen ka lapoktsü telemtetba agiogo. Iba district nung Naga nunger teimba lir.

State sorkari Imphal-

Dimapur-Guwahati bus service tenzükshiba aser National Highway 2 nung free movement aliba atema Amit Shah-i Manipur sorkar nem tenüngsang agütsü.

Senapati nung medical college tasen ka lapoktsü atema taoba ita olemtep tenzük aser July 23 nü Directorate of Health Services ajanga high level meeting ka ayonga amen. Senapati nung alirtemi mapang talangka nungi medical college aginüa arur aser iba ajanga Manipur kübok hill districts aser northern region nung alirtemi medical education angutsü aser healthcare services tashi aittsü.

Iba ya Manipur hill districts nung medical college tanabuba asütsü. 2022 nung Churachandpur Medical College lapokogo aser iba college nung MBBS students 100 azünger.

GOVERNMENT OF NAGALAND

DIRECTORATE OF EMPLOYMENT, SKILL DEVELOPMENT&ENTREPRENEURSHIP

NAGALAND: KOHIMA

GOVT. I.T.I TRADE TEST RESULT

Dated Kohima, the 27th August 2026

NO.DET-7/20/2001 (Vol-VII):/887 The result of the 103rdGovt.Industrial Training Institute, Trade Test under SCVT held inthe month of August 2026 at Government Industrial Training Institutes - Kohima,Chümoukedima, Mokokchung, Mon, Phek, Tuensang, Wokha & Zunhebotois hereby declared and the Roll Numbers of successful Candidates are given below: -

Govt. ITI	Pattern	SCVT	Roll Numbers
1. Kohima	Annual (1 year)	SCVT	Km- 01, 03, 04, 05, 07, 08, 09, 10, 11, 12, 13, 14, 15, 16, 17, 18, 19, 20, 21, 22, 23, 24, 25, 26, 27, 28, 29, 30, 31, 32, 33, 34, 35, 36, 37, 38, 39, 40, 41, 42, 43.
	Annual (1 st year)		Km- 44
	Annual (2 nd year)		Km- 35
	Annual (1 year) Repeater		Km- 52R1
	Annual (1 st year) Repeater		Km- 35R1, 55R1
	Annual (1Year) Private		Km- 01P, 02P, 03P, 04P, 05P, 06P, 07P, 13P
	Annual (1 st Year) Private		Km- 08P, 09P, 10P, 11P
	Annual (2 nd Year) Private		Km- 08P, 09P, 10P,11P, 12P
	Annual (1 st Year) Private Repeater		Km- 03PR1,
	Annual (2 nd Year) Private Repeater		Km- 02PR1, 03PR1
2. Chümoukedima	Annual (1year)	SCVT	Ch- 01, 02, 03, 04, 05, 06, 07, 08, 09, 10, 11, 12, 13, 14, 15.
3. Mokokchung	Annual (1year)	SCVT	Mk- 01, 02, 03, 04, 05, 06, 07, 08, 09, 10, 11, 12.
	Annual (2 nd year)		Mk- 12, 13, 14, 15
	Annual (2 nd year) Repeater		Mk- 18R1
	Annual (1 st Year) Private		Mk- 01P, 02P, 03P, 04P,05P, 06P,
	Annual (2 nd Year) Private	SCVT	Mk- 01P, 02P, 03P, 04P, 05P, 06P,
	Annual (1year)		Mn- 01, 02, 03, 04, 05, 06, 07, 08.
4. Mon	Annual (1 st year)	SCVT	Mn- 10,11, 14, 15, 17, 18, 19, 20, 21, 22,23, 24, 25, 27
5. Phek	Annual (1 year)	SCVT	Pk- 01, 02, 04, 05, 06, 07, 08, 09, 10, 11, 12, 13.
	Annual (1 year) Private		Pk- 01P
6. Tuensang	Annual (1 year)	SCVT	Ts- 01, 02, 03, 04, 05, 06, 07, 09, 10, 11, 12, 13, 14, 15, 16, 17, 18, 19, 20, 21, 22, 23.
7. Wokha	Annual (1 year)	SCVT	Wk-01, 02, 03, 04, 05, 06, 07.
8. Zunheboto	Annual (1 year)	SCVT	Zn- 01,02, 03, 04
	Annual (2 nd year)		Zn- 10, 11, 12, 15

Note:

1. Trade Certificate / Marksheet will be issued from 15th of September, 2026 (Tuesday) from their respective Govt. Industrial Training Institute.

2. The result for the Mechanic Motor Vehicle 1year trade in respect of Govt. ITI, Mokokchung and Mon will be declared only after obtaining Govt. approval for change of trade nomenclature.

3. For detail information candidates may contact their respective Head of Institute (Govt. Industrial Training Institute).

Sd/-

SAVIO VISA

Director

Office of the

Mokokchung Town Chuchuyimlang

Senso Telongjem

Mokokchung - 798601: Nagaland

TENÜNGSANG AGÜTSÜR

Wb.Talimeren, District Horticulture Officer, S/o Lt. Wb. Imkongwati aser Wt.Tongpangkoka, pai nendaka sorkar aser nübör tenzükba nung Longleng District Planning & Development board ajanga Independence Day 15th August, 2026 anogo nung District award anguba ajanga konang nüngsang tulu bener aru nung MTCST ajanga tetushi agütsür.

Ano nübür tenzüksü asoshi Tsüngremi pa arishi talang moajangma.

Sd/-

T. Yanger Pongen

President, MTCST

Sd/-

M. Tali Lkr

Secretary, MTCST



UNGMA IMPANG TANÜJANG KIDONG

TENÜNGSANG AGÜTSÜR

Wt. Chubasangla Longkümer, NSS, Joint Secretary Home Dept. D/o Wb. T. Imo Longkümer & Wt. Onentila Jamir, sorkar aser nübör tenzükba wadang nung nendaka aser ochishia inyakba reprangteta 80 buba India nüchiso anguba anogomung (15 August 2026) nung Governor's Gold Medal konang ngutetba asoshi Ungma Impang Tanüjang kidong ajanga tenüngsang agütsür.

Tsüngremi ne wadang maneni moajangma. Shirnokisa la nem konang tetushi agütsüogo, ozü tanüjang kidongi pelaba lemsateper.

Sd/-

Lanusüngküm Tatar

Sd/-

Rongsenpokba Tatar





Nepal nung tzümetsüng aluba sülen Red Cross züngsem temi teyari agüja aser timtem nung alirtem kumzükba mapang tangokba noksa nung angur. Iba lendong ajanga nisung 93,000 shi dak kongshiogo, ta Red Cross-i ashir. Iba lendong nung nisung 547 asüba ajungba jangjaogo.

Norway chuba Harald V arishi küm 89 nung süogo

Oslo, Luroi/August 28 (Agencies): Norway indang King Harald V, shiba Nazi-i par lima amokbangba mapang Unites States-i jena ao aser pa school azüngba mapang meimer den kibong akumtsü mechi Europe nungi tamarener jalatem den kibong akumtsü memulung, pa Hokulbarnü süogo. Pa arishi küm 89 liasü.

Pa Oslo nung aliba National Hospital nung anepdang 6:35 ako nung asü, ta palace ajanga ashi.

Harald ya Europe nung chuba tambutisang liasü. Pai chuba aliba kilung nung temelenshi bener arutsü aser chuba tain temi tawa-tanü menden yutsüba ama yutsütsü pai memulung. Par jabaso ya King Haakon VIII akumer.

Europe nung tanga chubatem ama Norway nunga chuba ya tema-tazütsü ka ama timba liasü, kechiaser parnok nüngtugu jenjang nung amshi saka chichiba tashi ya nisung million 5.5-i election ajanga shimba parliament nung democracy nung lir. Harald ya

Britain nung asoba tebo King Olav V, January 1991 nung asüba sülen chuba akum aser par linük nung toztü aser gas nung rongsenketzüng ainba mapang yimsü süa liasü.

"Linük ajunga mang ayimer aser Norway nübürtem Norway tenzükba nung arishi talangka aliba asoshi tenüngsang agütsür," ta Norway Ato Kilonser Jonas Gahr Støre-i sangdong ka nung ashi.

"Chuba ama küm 30 dak dema Harald V-i Norwegian nübürtem dak tamang aka. Asen dak tajungtiba anguba nung aser kati ka dak anguba nung pai asenok yariogo."

Harald ya 1937 küm Oslo anasa Asker nung aso, aser 1370 küm King Olav IV sülen Norwegian prince mezüngbuba linük nung asor akum. Iba sülen century aika Norway nung chuba meliasü aser 1905 küm Sweden aser Norway tsüngta tesendaktep raksaba sülen Harald tebou Haakon VII ya chuba asütsü shimtet.

World War II tenzükdang Nazi-i Norway amokbangba

mapang Harald ya küm asem tanur liasü. Mepudaktsütsü mechi tetsüi pa aser teyi Ragnhild aser Astrid anir mezüng Sweden-i jena ao aser iba sülen rong nung US-i ajen aser Harald tebu aser tebou nunger Britain nung Norway sorkar dang nungi jenoka ali.

Haakon-i Germany nungeri aginüba ama meinyakba yong nübürtemi pa nem akhum agütsü. Par kibong ya Norway nung June 1945 nung tanaben ajurutepa liasü. Harald ya public schools, Norwegian military college aser Oxford University nung azüng.

Tebu ya 1928 küm Olympic champion sailor liasü aser Harald ya Norway tenüng nung Olympics aika nung toktep aser 1987 küm World Championships nung gold ngua liasü.

Harald dang Europe nungi tamarener aser chuba jalatem den kibong akumtsü ajungshia liasü, saka pai memulungi lia arur tatem nung tebu temelaba agia school azüngdang ajurur Sonja Haraldsen den kibong akum.

Tena kibong akumba ajanga

Norway tashi mait akumtsü ta King Olav-i tsüboa liasü. Saka August 29, 1968 nü kiyimba anogo Norway nübürtem benjongtepa Sonja ya parnok indang chubatsür ama agizük. Tena tanur ana lir, Haakon aser teyi Märtha Louise.

Tetsür-tebur tebendang makai mezüng asor nem yimli senmang amangdaktsütsü mechi 1990 nung Norwegian Constitution tera melenshi. Ajisüaka iba temelenshi ya mamshir, anungji Haakon yagi tebu melentsü.

Harald ya January 21, 1991 nung chuba akum aser tebu aser tebou nunger ama "All for Norway" motto amshi.

Harald yagi 2016 küm LGBTQ+ equality, refugee aser tamangba yimsü balala bhukuma o jembia liasü, koba aikati meimlai liasü. "Norway nunger ya tetsür-i tetsür meimer, tebur-i tebur meimer aser tetsür aser tebur kati ka meimertem lir. Norway nunger aika Afghanistan, Pakistan, Poland aser tanga linüktem nungi aru aser parnoki Tsüngrem, Allah

aser universe nung amanger," ta pai shia liasü.

Taküm maksü aser tim masüba mapa inyak ta tai tongloksüba ajanga Norway chubar kibong kanga mejungi anokshitsü. Harald jabaso kinungtsü Crown Princess Mette-Marit ya asür Jeffery Epstein den tesendaktep liasü ta jembiba temai adokshi. Lai aibelen mapa inyakbabo mali aser lai tatok meshia liasü.

Kasa mapang lar jabaso tambosang Marius Borg Høiby ya tashiyim amshia shi nung medemba nung aija küm pezü tepuokdak ayutsü obendang agüja liasü. Høiby ya Mette-Marit-i Haakon majurudang asoba lir aser pai chubar nüngja mamshir mesüra mapa meinyaker.

Harald ya 2024 küm Malaysia nung südoksenema amungba mapang temang mejungi kuma pacemaker inoka liasü aser ano February 2026 nung Spain indang Tenerife asetkong nung südoksünema amungba mapang skin infection ajanga mozü kidang amungtsüsa akum.

TXG Expo Nagaland 2026 nung F1 Sim Racing India Open Time Trials lir



Dimapur, Luroi/August 28 (TYO): NBCC Convention Centre, Kohima nung tang TXG Expo Nagaland 2026 sentong agia alidak August 28, 2026 nü F1 Sim Racing India Open Time Trials amenoka lir.

Professional-grade Formula 1 racing simulators ya iba expo nung amenoka sentong nung adaner temi F1 sun racing ajangshir aser angati F1 Sim Racing India Open Time Trials nung shilem agir.

Tejangrar temi ano tang

telidak F1 Sim Racing India Open nung atema registration agitetsü saka registration fee agütsüsüla.

Qualifying time nung alizüing tongteter tem shima Regional-level competition nung tokteptsü aser yangji takok angurtem National-level championship nung tokteptsü akok, koba junior aser senior categories lir.

TXG Expo nung adaner aika F1 Sim Racing booth nung arua kaketshir aser F1 janrar temi professional-grade

simulators ajangshia driving skills tendanger.

Iba championship ya Mumbai Falcons Racing Limited ajanga ayongzük, koba Indian motorsport team ka lir aser alima tesem balala nung racing competitions nung shilem agia arur.

F1 Sim Racing India Open ya TXG Expo Nagaland 2026, Kohima nung August 29, 2026 tashi alitsü, anungji tejangrar temi iba tetoktepba nung shilem agitsü maongka maneni angutsü.

Champions Cup 2026: Mez & Co final tongogo

Kohima, Luroi/August 28 (TYO): Brehostibarnü Indira Gandhi Stadium, Kohima nung Mez & Co-i kanga junga asayateta Vanguard Academy madak semi-final tanabuba nung 7-0 agi takok ngua 1st Atuo Mezhür Sekhose Super League - Champions Cup 2026 final tongogo.

Iba takok ya ajanga Mez & Co ya Champions Cup final nung asayatsü maongka ajangtet, kong parnok ya Sechü Zubza FC den August 29 nü final asayatsü.

Mez & Co asoshi mezüing goal ya Kevizolie Kin-i minute 28 buba nung agütsü aser ano paisa minute 58 buba nung goal ka agüja liasü. First half sülen minute 47 buba nung Vinato Achumi-i goal ka agüja 2-0 akum.

Mez & Co nungi asayar temi maneni iba asaya amokbanga asayatet aser minute 63 buba nung Nisede Peseyie-i goal pezü buba agütsü aser minute ana lir Peteviso Kezie-o-i ka agütsü.

Vanguard Academy nungi Nendy Kath-i minute 68 buba nung par tsütsü goal ka idaktsü aser minute 70 buba nung Neihelie J Mepfhüo-i ka agüja 7-0 nung asaya tembang.

Mez & Co aser Sechü Zubza FC tsüngta final ya Indira Gandhi Stadium, Kohima nung nikongdang 6:00 ako nungi asayatsü.

Asayamung shibangba sentong nung akhumdong ama Nagaland Football Association (NFA) tir aser All India Football Federation (AIFF) indang Executive Member adentsü.

Semi-final tanabuba nung sentong akhumdong ya tir Sedevikho Angami-i anir Chümoukedima District Football Association liasü.

Iba asaya nung referee ya Michael Dul aser assistant referees ya Vihetuo Chietsü aser Mhasikhonuo Paünüo liasü. Imlimerenla Jamir ya fourth official liasü aser Match Commissioner ya Medozevi Punyü liasü.

Champions League: PSG, Man City, Aston Villa & Barcelona telok kasa nung lir

Monaco, Luroi/August 28 (Agencies): Defending champions Paris Saint-Germain ya taküm Champions League nung Manchester City aser Aston Villa den asayatsü, aser iba draws ya Brehostibarnü tembanga liasü. Iba asayamung league stage nung PSG ya Barcelona den asayatsü lemezükogo.

Anaben ashidena Champions League akoker, PSG ya Parc des Princes nung Barcelona den asayatsü aser Aston Villa den away nung asayatsü aser ano league phase mapang Manchester nunga oa asayatsü.

Premier League champions Arsenal-i Emirates Stadium nung iba asayamung 15 ben koka aliba telok, Real Madrid den asayatsü aser Bayern Munich nunga oa asayatsü. Mikel Arteta'er telok ya taoba season final asayadang penalties nung PSG-i akok aser taküm league phase nung Borussia Dortmund, Real Betis, Lille, Napoli, Azerbaijan champions Sabah aser Slavia Prague den asayatsü.

Enzo Maresca'er Manchester City ya Etihad Stadium nung PSG den asayatsü aser iba sülen Barcelona-i aotsü, kong parnoki Spanish FIFA World Cup winner Rodri den tanaben

ajuruteptsü, shiba taküm sen £65 million yong Catalan club nung oa aden.

Napoli telok Etihad-i arudang Manchester City ya par telok nung taoba midfielder Kevin De Bruyne den ajuruteptsü aser league phase nung Sporting CP, Porto, RB Leipzig, AEK Athens aser Lens den asayatsü.

Europa League winners Aston Villa ya season ka lir Champions League-i meyipa shilangtsü, aser par asayadak PSG aser Borussia Dortmund den asayaba sülen Barcelona aser Galatasaray-i aotsü.

Unai Emery'er telok ya Club Brugge, Fenerbahce, Viking aser Slavia Prague den asayatsü lemezükogo.

Manchester United ya küm ana sülen Champions League-i meyipa shilangtsü, kong league phase nung Bayern Munich, Atletico Madrid, Roma, Sporting CP, RB Leipzig, Villarreal, Sabah aser Como den asayatsü.

Liverpool ya Atletico, Porto, Villarreal aser Lens den 'home' nung asayaba sülen Inter Milan, Club Brugge, Fenerbahce aser LASK nung asaya senzütsü.

Champions League league phase ya September 8 nü tenzütsü aser final round ya January 27 nü asayatsü. Fixture tejangja August 29, Honibarnü sangdongtsü lir.

DYRS-i saisapong nung tajungtem nem senpet agütsüsü

Dimapur, Luroi/August 28 (TYO): National Sports Day 2026 nüngtem nung FY 2025-26 atema saisapong nung tajungtem nem senpet agütsüba sentong ka August 29, 2026 anepdang 10:00 ako nungi tenzüka IG Stadium, Kohima nung agitsü, ta Directorate of Youth Resources and Sports ajanga

metetdaksüogo.

NOA nung affiliate süa aliba disciplines/tournaments nung International, National & Zonal/North East levels jenjang nung medals angur nem iba sempet ya agütsüsü.

Department-i iba atema apply süa alir ajunga dang pei temsüa ali-mali metettsü atema pei State Sports Association

den tongteprateptsü ayongzükogo. Registration ya iba sentong agitsü aliba tesem nung anepdang 8:00 ako nung tenzütsü aser 9:30 ako nung tembangtsü. Awardees ajunga anepdang 8:00 ako tashinung IG Stadium nung registration venue, Hall A tonga arutsü metetdaksür, ta sangdong ajanga ashi.

Yingli College Longleng nung National Sports Day amung



Dimapur, Luroi/August 28 (TYO): NSS Wing, Yingli College, Longleng ajanga August 27, 2026 nü Borgohain Hall, Longleng nung National Sports Day munga liasü.

Iba sentong ya NSS Wing ajanga Yingli College Students' Union (YCSU) den lungjemer Ministry of Youth Affairs & Sports, Govt. of India, MY Bharat, Khelo India Dialogue - Khel Ki Baat, PM Modi Ke Sath den yaritepa ayongzüka liasü.

Hockey asayar tejen Major

Dhyan Chand asoba anogo bilemteta aser lanurtem nem saisapong aser temang anema aliba yimya sübadaktsütsü nükjidong nung iba sentong ya agia liasü.

Sentong tenzüka Yingli College indang vice-principal Dr. B. Henshet Phom-i pela agizükba o jembi aser iba sülen National Sports Day amungba indang jembia liasü.

Khelo India Dialogue indang live screening aser sensaksemba sentong ka August 24, 2026 nü agia liasü.

Iba sentong nung kaketshir aser tesayur temi NASHA MUKTH ABIYAN Pledge agia liasü.

Iba sentong nung Yingli College nungi NSS Volunteers, NCC Cadets, non-volunteer students, teaching and non-teaching staff, MY Bharat volunteers, Longleng District lanurtem. DSO aser DYO offices nungi jaokertem dena liasü. Sentong nung ajak agi nisung 305 dena liasü.

Sentong tembanga melepzüing o jembi aser shilem agiba kulizüing lema liasü.

BILEMDANGANG

“Mapa tila ka nentaka inyakdang mapa tuluba ka inyakteter alir”